

# ANDRÉ RIEU- brunch 2016



## ANDRÉ RIEU-brunch 2016

De winter haet 'n paar maond  
vakantie genaome en gewoeën 't  
nieje jaor aafgewach.  
Daorum kriege we dit jaor unne  
daag kedo, det is moeëj  
meigenaome.



In elk geval kóste we zónder sniej of ies naor de brunch in Zalzershaof.  
De gladde waeg kin ik bes misse maar wat duit de gemeente straks met  
zoeëvuuel struizalt?

Weer 'n probleem d'r beej veur de gemeinteraod.

De steis waal raar te kieke as juus de **Maagdenpalm** bleujd in December,  
alhoewaal.....

Ouk 't Jezuskiendje is gebaore in December óet de Maag Maria, det kin  
gen toeval zien !

Ik mót de **3 keuninge** ens appe of belle en eur vraoge of ze de volgende  
kier wat leukere berichte mei kinne bringe óet 't oeëste.

Det wuurt verdorie waal ens tied.

Met gold, wierouk en mirre kins se de waereld toch neet verbaetere!

Kapelmeister Wiek had zich 'n wickend vreej genaome,  
maar gen noeëd vervanger Karel waar good ingewerk.  
Idderein woort welkom geheite met 'n moej stökske meziek.

**ANDRÉ RIEU** woel ouk waal ens de brunch van Rapido meimake.

Nae, det is gen geintje .....det waar  
'n "**Serious Request**".

Wie hae zien offerte leet zeen  
hebbe we toch maar um 'n DVD  
gevraag.

Dao kins se ouk naor kieke en  
luustere en neemp neet zoeëvuuel  
plek in.

De Rapidokas blief wat mieër  
gevöld, anders is de kaskómmissie  
straks zoeë klaor met telle.

Tenslotte mótte we beej Rapido zelf  
de bóks ophalde met ós eige  
kontributie en activiteit-beejdrages  
van de leeje.

Det kinne ze beej VVV neet zegge,  
die kinne van ós klein klupke nog  
wat liere.



Wis geej des se beej **André R.** ouk moeje sieräöj kins bestelle.

'Ne golde ketting, 'ne broche en zelfs manchetsknuip.....

alles haet met 'n fioeël te make det sprik vanzelf.

Maar beej de manchetsknuip steit;

**Manchetsknoten-viooltje; voor de man met stijl.**

Beej Rapido heb ik d'r genne met fiuelkes-manchetsknuip rónd zeen fiete,  
die männer zulle waal in 'n andere ambiance gaon brunche met cachet.

Det kin noeëts zoeë gezellig zien as beej Zalzershaof, maar.....waal met  
fiuelkes-gedeuns.

**ANDRÉ** zien zeuns zien ouk harde kraozers.

Zoon Pierre zörg d'r veur det 't ganse RIEU-circus everal picco bello in  
orde is.

Zoon Marc is de **kunstenaer** binne de femielie en haet gewoeën wat

schilderieje opgehangen beej 'n concert van Pap.

'N golde idee, de schilderieje waere noow euver de ganse waereld verkoch.

Die passe gemekkelik in de containers die mei gaon naor China, Japan of Brazilië

as Pap dao 'n concert mótt gaeve.

As Limburger blief se waal neuchter en praktisch dinke netuurlik.

Nog efkes 'n Serious Request aan idderein;

Ziet geej d'r 't volgend jaor ouk weer beej, weej waal.

**Tradisies** móst se **in iere halde**, d'r wuurt al genóg weggekiep.

Haet emus toevallig 'n leuke act, 'n gedichje, 'n listig denske of kwant goochelnummer,

**meld óg beej de brunchkómmissie.**

Messchiens kump d'r nog 'n verborge talent te veurschien ónder de leeje.

Det zoel beej de volgende brunch 'n leuke verrassing zien veur idderein.

As aafsloéting 'n moeje óetspraak veur 2016:

**Yesterday was history**

**Tomorrow is a mystery,**

**Today is a gift,**

**That's why we call it the present.**

Elly van Elswijk

